

NAQQIUT

Siunnersuut 2. august 2016-imeersoq taarserlugu

(Iluarsiissummi taaguutip "tusagassiorfiit" atorneqarnera siunnersuutip kalaallisoortani assigiissarneqarpoq).

Uunga siunnersuut: Tusagassiorfinnut tapiissuteqartarneq pillugu Inatsisartut inatsisaat nr. xx. xx 2016-imeersoq
(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit matumuuna tusagassiorfinnut tapiissuteqartarneq pillugu Inatsisartut inatsisissaattut siunnersuummik saqqummiiniarpunga.

Siunnersuummi siunertaavoq tamat oqartussaaqataanerisa aamma tamat oqallinnissaasa periarfissaqarnerulernissaat siunertaralugu nutaarsiassat inuiaqatigiinnut piorsarsimassutsimullu pingaaruteqartut tamatigoortuullutik amerlallutillu neqeroorutaanissaasa pingaarnertigut qulakkeerinniffiginissaat siuarsarnissaallu.

Taamaalillunilu tusagassiorfinnut tapiissuteqartarnissamut aqqissuussineq siunnersuutigineqartoq aqutigalugu tusagassiorfiit nutaarsiassaleriffiillu tamatigoortunik neqeroortalerinissaat qulakkeerneqassaaq, nuna tamakkerlugu najukkanilu, amerlasuunillu nutaarsiassaqartarneq tusagassiorfiit ataasiakkaat aamma tusagassiorfiit akimorlugit qulakkeerneqarsinnaassalluni. Pisortat tusagassiorfinnut tapiissuteqarnerat aqutigalugu saqqummersitat, taakkunanilu imaritinneqartut tamatigoortuunissaat tapersersorneqassaaq siuarsarneqarlunilu.

Naalakkersuisut naqitatigut internetikkullu massakkut pisunut nutaarsiassaqartitsiviit peqatigalugit tusagassiorfinnut tapiissutit atuuttut eqqartoreerlugit tulluurtut isigisimavaat tamakkununga immikkut ittunik inatsisiliornerit Inatsisartunit aalajangersaaffigisariaqartut. Aaqqissuussineq imaqarnermigut ingerlatsinerimut tapiissutit aqutigalugit suliniutinut tapiissuteqartoqarnissaa aamma tunisaqarnissaaq pillugit tapiissuteqarnissamut aaqqissuussinerit atuuttut ingerlateqqinnissaannik aallaaveqarpoq.

Inatsisitigut iluarsiinikkut tusagassiorfinnut tapiissuteqartarnissamut malittarisassat naalakkersuinikkut illersorneqarlutik qulakkeerneqassapput, malittarisassallu taamaalillutik allanngortinneqarsinnaassallutik tamanna pillugu naalakkersuinikkut isumaqataasoqarpat. Tamanna aallaaviatigut tusagassiorfinnut tapiissuteqarnissamut malittarisassat

akuttunngitsumik allangortinnginnissaanut qulakkeerinnissaaq. Tamanna tusagassiorfinnut tunngatillugu piffissamut ungasinnerusumut pilersaarusiorsinnaanermik periarfissiissaaq, soorlu tunisisinnaanermut ineriartortitsinissamut aningaasaliinissaaq eqqarsaatigalugu.

Taamatut oqaaseqarlunga siunnersuut Inatsisartuni suliarisassanngorlugu ingerlateqqippara.